

欽  
定  
全  
唐  
文

欽定全唐文卷一百九十五目錄

楊炯六

大周明威將軍梁公神道碑

從弟去盈墓誌銘

從弟去溢墓誌銘

從甥梁錡墓誌銘

隰州縣令李公墓誌銘

常州刺史伯父東平楊公墓誌銘

杜袁州墓誌銘

欽定全唐文卷一百九十五

楊炯六

大周明威將軍梁公神道碑

蓋聞君爲元首臣作股肱或論道三槐或折衝千里至有道存俎豆藝總干戈高視翰墨之英獨布爪牙之旅究青編於學府業有多聞受黃石之兵符筭無遺策故得九功咸敘七德攸彰文武不墜公實兼美公諱待賓安定臨涇人也竦以英才遠邁知州縣之徒勞鴻以抗節遐征覽帝京而有作由是五噫標興播金石而騰徽七貴承榮綰銀

黃而疊茂貞規盛烈映史凝圖粗紀詠歌無俟詳確高祖  
禦後魏駙馬都尉侍中少保金紫光祿大夫揚州總管贈  
太尉諡昭公食邑三千戶銀榜增輝玉壺流渥位隆三少  
化洽五胥旣而幽壟埋魂終降槐庭之贈高門納駟式居  
茅社之封曾祖睿宇文周駙馬都尉鄜秦二州總管光祿  
大夫兵部尚書隋益州總管蔣國公贈司空食邑三千戶  
白水時清乳虎之謠行息祿符垂翼叩馬之諫必申加以  
主西序之羣英名高八座導文翁之遺訓學富三巴茂先  
榮級忽光泉壤漢祖寵章永存帶礪祖演隋沙州刺史上

柱國公踐仲寧之餘躅奸邪斂手簽孝仁之遠蹤羣胡革  
面連州跨郡邁陶氏之隆基開國承家掩張門之累葉父  
贊隋左千牛備身驪山府上騎柱國皇朝豐王府諮議雲  
州司馬冀州長史蔣國公襲良弓於簪笏榮侍紫宮翼雕  
戟於巖廊肅趨丹地西園坐讌侶明月而飛文北土行康  
望浮雲而展足公漸潤膏腴發靈川嶽七年可識抱杞梓  
而呈才千里見知負騏驥而騁駿靈臺遠鑒與霜月而齊  
明智府宏深其煙波而等曠踐仁義於區域白璧已輕許  
然諾於樞機黃金豈重因心孝友宜於自然率志謙沖得

乎所性不脂韋而求達不詭計而自媒被玉軸之文章三  
冬遽足窮金壇之祕訣百戰不孤譽滿寰中聲蓋天下而  
學優將仕允屬名家欲昇鴻漸之姿終佇鶴鳴之聞以皇  
朝麟德二年補左親衛從資例也屬金甲出戰玉帳論兵  
從命文昌問罪遼碣公提戈赴海投筆從燕智者有謀仁  
者必勇孤鋒直進九種於是克清匹馬橫行三韓由其殄  
滅疇庸賞最我有力焉俯洽恩波泛承勲級卽授上柱國  
公深慚位薄命舛數奇雖霑勒石之勲未展披堅之效嗟  
乎揚子雲之才藻空疲執戟馬相如之文詞猶勞武騎今

古同貫夫復何言旣而從牒隨班牽絲祇務起家拜朝議  
郎永淳元年正月三十日授伊州伊吾縣丞非所好也路  
指金河途連玉塞塵沙共起烽火相驚秋草將腓胡笳動  
吹寒膠欲折虜騎騰雲公佐佑多方掌司攸寄服叛懷遠  
擒奸擿伏於是寇騎不敢窺邊歌頌因滋溢境曾未朞月  
政令大行特簡帝心超居不次永淳二年二月四日制授  
昭節校尉守右衛蒲州府佐果毅仍令長上兼上陽洛城  
等門供奉公洞曉戎章妙詳兵律軍國是賴戎幕允歸由  
是徼道長巡嚴扃每奉朝求夕警不怠於風霜善牧能防

更申於閑阜其年十月七日奉勅命於大內祥麟殿檢校馬公識高東野職參西極勵銜策則追風逐日加剪拂則絕電奔星馱馱將駙駟齊衡驥騮其駒駉伏櫪於是龍媒間出麟友挺生伯樂多謝於精微日碑有慚於秣養恩制褒獎又加崇秩文明元年二月二十日遷游擊將軍仍依舊長上大周革命兩儀開闢爰覃作解之恩式暢惟新之典勤勞夙著休望允歸拜職遷榮實符僉議天授元年九月十六日加威武將軍守左玉鈐衛翊善府折衝都尉依舊長上封安定縣開國男食邑三百戶公祇奉王庭職司



兵衛八屯由其增峻五校於是克宣翼翼兢心積劬勞於  
歲月勤勤忠志懷跼蹐於序時憂能傷人竟成沈疾以長  
壽二年正月六日終於神都旌善里私第春秋五十惟公  
弱不好弄卓爾不羣九歲明詩七齡通易月初能對卽謝  
黃童日下相酬還慚夫子經耳不怠歷口不遺性沈深有  
器度能倜儻無拓落尤重交友雅愛林泉月幌風襟每吟  
謠於賤綵花新葉早必賞會於琴樽加以啼猿落鴈之奇  
鸞驚鳳翥之妙瀉水懸河之辨背碑覆局之精標映前哲  
公實多敏至孝過人雍和絕俗事父母則造次不違友兄

弟則溫柔必盡旣風樹興感霜露躋悲聿修之德惟新欲  
報之恩罔極虔誠大象宏誓小乘廣樹慈仁庶憑因果月  
抽官俸日減私財並入薰修咸資檀施故得雕檀之妙俯  
對禪龕貝葉之文式盈梵宇粵以大周長壽二年歲次癸  
巳二月辛酉朔二十四日甲申遷窆於雍州藍田縣驪山  
原舊塋禮也葬事之屬一皆官給鼓吹儀仗送至墓所墳  
開白日終留恨於滕城禮被皇家忽霑榮於霍隧嗚乎哀  
哉嗣子左千牛去疑哀纏泣柏思結殮荼仰庭禮而不追  
覩楹書而增慕恐元穹倚杵碧海成桑敬勒堅貞乃爲銘

曰

大哉嬴國遠矣少梁與秦同祖今則夏陽爰暨伯翳胙土  
惟良自茲厥後人物克昌逮乎漢朝令望不已三世連輝  
七侯承祉或顯或晦有文有史烏奕圭璋芬芳蘭芷少保  
名揚司空道泰惟祖惟禰聯軒蓋挺生令則在邦之最  
邉歲騰芳髻年超靄君號神童晚稱英傑佩仁服義旣明  
且哲七步立成五行不輟家惟萬卷韋實三絕詞高許下  
學富淹中志惟謹潔心亦沖融溫淳植性朗潤在躬閨門  
禮洽朋友財通思若雲飛辯同河瀉兼該小說邕容大雅

武檀孫吳文標董賈樹下啼猿封中試馬且文且武執戟  
登位海隅不賓命我偏帥旣陪勒石還從飲至輔翊百里  
褒昇佐貳旣總兵權入司宮掖徼道宵警禁門曉闢式重  
其駿載懷斯癖我馬旣良我軍旣雄折衝千里趨奉九重  
行承芝誥坐啓茅封恨深負米榮暨擊鐘爰持戒律思答  
慈容將福有徵謂仁必壽如何淑德遭此兇咎孺慕崩心  
惇嫠縮首夜泉局閉天長地久

從弟去盈墓誌銘

古者皇帝軒轅氏沒帝嚳高辛氏作幼而徇齊長而敦敏

則天下之人用其教者百年忠肅恭懿宣慈惠和則天下之人謂之才者八子赤烏流而白魚躍有周武之興王彤弓一而盧矢千有晉文之啓霸雖隱公遜位哀侯失國而文之昭也武之穆也司徒爲五教之官有社稷焉有黎人焉丞相臨萬幾之職峻函鼎盛赫奕於朱輪河洛台階昭彰於白玉積善餘慶信而有徵國子進士楊去盈字流謙宏農華陰人也曾祖諱初周大將軍隋宗正卿常州刺史順陽公皇朝左光祿大夫華山郡開國公食邑本鄉二千五百戶唐虞之稷契魏晉之裴王晏嬰可以事百君臯陶

爲之謬九德麾蓋兵馬人知牧伯之尊名山大川地積公  
侯之氣王考諱安僞鄭王充遙授二十八將封鄆國公尋  
謀歸順爲充所害皇朝贈大將軍旌忠烈也陶謙雅尚祖  
逖雄心會天子之蒙塵見諸侯之釋位雖陳平去就潛懷  
仗劍之謀而石勒兇殘遂及推牆之禍父某潤州句容遂  
州長江二縣令朝散大夫行鄧州司馬文武兼備清明在  
躬人無間言位不充量四方取則孔宣父之踐中都百里  
非才龐士元之登別駕若夫庭生玉樹身帶金鐶有衛玠  
之風神有張良之容貌蔣琬之譏盛允責在司空陳蕃之

對薛勤志清天下觀其昏定晨省立身揚名怪草蔚其休  
徵神魚會其冥感莊公獨歎聞潁叔之純深有道相推見  
茅容之盡禮則閨門雍穆以孝聞也輔仁會友合志同方  
晏平仲之善交鮑叔牙之知我張堪死日妻子唯託於朱  
暉劉惔生平風月每思於元度則朋友之德若蘭芬也朱  
穆好學終日忘餐譙周研精欣然獨笑張華四海之內若  
指諸掌班固百家之言無不窮究鉤深致遠悅邱墳也八  
音繁會五色章明動天地而感鬼神序人倫而成孝敬陽  
臺並作楚襄王賜雲夢之田上林同時漢武帝給尚書之

筆則瓊敷玉藻未足多也自攝齊東序撰杖西膠唯宰我之能言貴顏回之有德成如麟角道尊於璧水之前翼若鴻毛俯拾於金門之下方將咫尺宣室扈從明庭申賈誼之忠讜盡揚雄之規諫豫章七載擢修幹而聳長條有鳥三年搏積風而運滄海豈期數有述否天無皂白苗而不秀秀而不實蓋有是夫古人有言沒而不朽者此之謂也春秋二十有六以上元三年五月二十二日歿於京師勝業里嗚乎哀哉至儀鳳四年十二月二日歸葬於華陰之某原不念本也山河鬱鬱松柏蒼蒼骨肉閉兮歸后土魂



魄遊兮思故鄉三荆搖落五都悲涼痛門戶之無主悼人  
琴之兩忘嗚乎哀哉銘曰

高掌遠蹠濁涇清渭天子諸侯司空太尉星辰鼓舞山澤  
通氣道在者尊德成爲貴賈家三虎偉節最怒荀氏八龍  
慈明無雙劒光沖斗璧氣浮江據於道德聞於家邦子之  
承親溫席扇枕子之友悌同輿共寢朝歌不入盜泉不飲  
垂露崩雲繁紘縟錦明經太學射策鴻都揚名天子高揖  
司徒鱗翮將運波濤不虞子之喪也良可悲夫瞻望不及  
佇立以泣唯見黃埃心傷以摧躑躅兮徘徊嗚乎兮哀哉

長夜漫漫何時旦魂兮魂兮歸去來

從弟去溢墓誌銘

處士宏農楊去溢年二十卽華山公之曾孫大將軍之孫  
朝散大夫鄧州司馬之第四子也維岳有五有華山之金  
石焉山阜相屬含谿懷谷所以鎮其南也維瀆有四有河  
宗之玉壁焉波瀾汨起洄洑萬里所以經其北也言其土  
地則巨靈之高掌遠蹠作西漢之城池敘其衣冠則太尉  
之四代五公爲東京之柱國然後積勲累德枝分葉散大  
君有命臨夏日之壇場天子動容聽秋風之金鼓是以熊

罷入兆羔鴈成羣黃憲之名聞於海內陳蕃之志掃於天  
下羣童忽聚逢苦李而懸知賓客相過問楊梅而卽對善  
父母爲孝善兄弟爲友居家可移之道也利者義之和貞  
者事之幹元亨日新之德也若夫羽陵遺策汲冢殘書倚  
相之八索九邱張華之千門萬戶莫不山藏海納學無所  
遺至如白雪迴光清風度曲崔亭伯真龍之氣揚子雲吐  
鳳之才莫不玉振金聲筆有餘力遠心天授高興生知盡  
江海之良圖得煙霞之祕筭貞不絕俗從容於名教之場  
道由人宏坐臥於羲皇之代於時朝廷之上山林之下英

儒瞻聞之士洪筆麗藻之客希末光而影集聽餘聲而響和者猶藩籬之望天地鱗介之宗龜龍也嗟乎陰陽爲道大道無亭毒之心禍福唯人聖人有抑揚之教智焉而斃仁焉而終今也則亾歎顏回之短命死而可作冀隨會之同歸文不在茲乎天之將喪也以某年某月某日終於某所越儀鳳四年十月二日歸葬於華陰之某原林野彌望關山寥廓樵童牧豎孟嘗君之池臺一去千年丁令威之城郭悲纏於魯衛痛深於花萼姜肱沒齒無因其被之歡鍾毓生年無復同車之樂嗚乎哀哉銘曰

叔虞建國天錫之唐伯僑受氏食采於楊五侯簪黻四代  
軒裳有德有行如圭如璋乃生男子初寢之牀從公小大  
辨日炎涼天下之寶邦家之光神鋒太峻旗鼓相當事親  
以禮左右無方交朋以信芝蘭有芳文犀健筆白鳳雕章  
鵬鷗齊致江湖兩忘謂天輔德則惟其常殲我吉士於何  
不傷關山搖落洲渚蒼茫黃塵匝地白露成霜左右刮骨  
親賓斷腸摧殘玉樹埋沒金鄉交交黃鳥爰集於桑命不  
可續人之云亾

從甥梁錡墓誌銘

故右衛率府翊衛安定梁錡年二十有八以上元三年秋八月某日終於某所圖其景宿天有大梁之星辨其物土地有大梁之物考其衣冠人有大梁之姓綜乾坤而列位兼水木而成文業耕織而樂琴書有梁鴻之雅尙生封侯而死廟食有梁竦之雄圖西山求白鹿之仙東海受黃蛇之寶曾祖某光祿大夫開府儀同三司驃騎將軍清河太守右衛大將軍同州刺史上柱國郡守旁通於月建儀同上法於太階光祿大夫下大夫之職驃騎將軍大將軍之比祖其河南澠池令鄭州司功參軍事冀州蒲州二府司

馬朝散大夫紀王府司馬襄州同州二長史仲由宰邑蕭  
何主吏桓溫之徵謝奕暫爲司馬之官周景之禮陳蕃仍  
降題輿之命考某國子學生霍王府參軍并州大都督府  
兵曹揚州大都督府錄事參軍仲尼閑居曰參不敏天子  
命我參卿軍事張常山之福應直保金鈎謝太傅之閨門  
唯生玉樹所以圓光折水真氣衝天孩笑之時見之者知  
其孝友能言之際聽之者許其聰明審清河管輅之天文  
對江夏黃童之日蝕揮其勁翮則鳳凰飛鳴於赤山整其  
蘭筋則駿馬騰驤於綠地若夫龍神負卦瑞雀銜書安釐

王汲冢之文穆天子羽陵之籍莫不因條報葉望表知裏  
鄭元殫見覽萬卷之八千班固洽聞涉五經之四部至如  
琯弧夜月筋角三材鐵劒秋霜煙雲五色莫不推之以智  
勇成之以揖讓歷諸侯而說劒直之無前引司馬而操弓  
觀者如堵可謂多才天縱盛德日新曼倩不讓於詩書翁  
歸兼強於文武由是交道遂廣聲名益振朱家大俠滕公  
有然諾之言劇孟過人袁盎有逢迎之禮及其從微至著  
資父事君藉丹書之勲業參黑衣之行伍神宮海外瞻鏤  
榜於明山太室雲端聽仙簧於洛水蜩駕馳道周廬甲觀



方當奉詞出使萬里行封受命忘身三軍拜將豈期年歲  
朝露浮生過隙漢逸人之雅操命也如何魯司寇之知言  
苗而不秀嗚乎哀哉望吾子者空懷倚閭之歎嗟予弟者  
獨有亡琴之悲從日月於龜謀考圖書於馬鬣越以儀鳳  
三年春二月某日甲子葬於某所悲夫吾見其進由來孔  
李之家吾謂之甥實曰何劉之族陽元旣歿瞻舊宅而無  
成康伯不存對元言而誰與銘曰

山河帶礪金木精靈磊磊千丈森森五兵駢騶西掖出入  
東明人壽無幾皇天不平碑留郭泰挽送田橫終寂寥於

金石錄卷之三  
相宅空嗟歎於佳城

隰州縣令李公墓誌銘

公諱嘉字大善隴西成紀人也趙郡太守雍州大中正上  
開府永康公之孫幽州都督鎮軍大將軍上柱國丹陽公  
之子重華以文明允塞謨九德於臯陶仲尼以恭儉溫良  
緡六經於柱史將軍李牧人主願其同時河尹李膺天下  
思其執御況乎衣冠代美祖考家聲占於日月爲宗周之  
姬姓誓以山河則炎漢之劉氏公門承將相地積英靈望  
之儼然橫斷山而鬱起聽其言也注懸河而不竭玉則秦

王所見天照白虹劒則殷帝所傳星浮紫氣假使蔡中郎  
之博學郭有道之人倫何嘗不迎王粲而倒屣爲茅容而  
下拜起家爲太子左千衛以調升也按河圖於玉版震一  
索而爲長男考天象於銅渾心前星而爲太子直城霞遶  
曲障雲平出入青牓之門周旋黑衣之列稍遷越王府戶  
曹參軍越之建國也地居南斗之躔王之受封也禮極東  
門之拜郗霍所以隆懿親共和所以資明德一言而干楚  
后卽從雲夢之畋三見而說趙王仍襲上卿之印又遷隰  
州令川原爽塏風俗和平晉獻公之嗣夷吾是邑代恭王

之子郢容爲侯陽泉依六壁之城孟津合三溪之水公以輜車就列墨綬當官有蠶績於邨人用牛刀於魯邑市廛無競不假鞭絲學校方興唯聞擊石諸侯取其軌則四海瞻其儀表爲杜陵之男子誰繼後曹茂鄉里之小人願辭彭澤於是退歸初服就養私門戲嬰兒於階下扶老生於井上尋丁外艱哀毀踰制加人一等俯就三年服闋襲封丹陽公勲上騎都尉公以安車禮盛賜杖年高被服先王之道優游太平之化左琴右書謀孫翼子居常飽德不言何氏之萬錢直置當仁豈特于公之駟馬清風可賞必有

鸞鳳相期白雪時遊多以神仙見屬義形於金石節貫於  
松筠西山五日之朝將化羽而生翼北海明年之驗便展  
辰而至已以永淳元年八月二十一日終於京師道政里  
之私第享年七十二嗚乎哀哉長子隨州光化縣令守節  
等哀纏弔鶴痛結鄰人孝之始也則身體髮膚所以全其  
性孝之終也則衣裳棺槨所以成其禮天高八萬想京兆  
而何從地闊三阡對佳城而有恨越宏道二年歲次甲申  
正月甲申朔二十六日巳酉陪葬於昭陵東南之平原烟  
樗櫟庸材餅簞小器仰惟先友叨雅契於金環俯逮嘉姻

荷深知於玉潤南容有道僅聞將聖之言東武建瑩俄述  
安仁之賦嗚乎哀哉乃作銘曰

爰初帝子堯之大理降及真人國之柱史衣冠百代慶靈  
千祀吉兆占熊嘉名贈鯉聿修厥德必復其始大孝因心  
至仁由已肅成門內章華宮裏父任爲郎學優則仕陽山  
之曲蜀江之涘月旦乘鳧田間狎雉其心若鏡其直如矢  
亟改炎涼罷歸桑梓象賢舊國安車暮齒忽愴池臺俄悲  
生死郭門一望郊煙四起夫復何言平生已矣

常州刺史伯父東平楊公墓誌銘

楊氏之先其來尚矣在皇爲皇軒在帝爲帝譽在王爲周武在霸爲晉文此之謂不朽西京爲丞相東漢爲司徒魏室爲九卿晉朝爲八座此之謂世祿公諱德裔宏農華陰人也卽常州刺史華山公之元孫左衛將軍武安公之長子生而岐嶷代不乏賢事親以孝聞在鄉黨恂恂如也始以父任爲太子左千牛備身轉秀容華亭福昌雒四縣令詔封東平公策勲上柱國是時也天子仄席求賢勵精爲化以公屈臨小縣焉用牛刀處治中別駕之任方展其驥足耳擢拜潁州幽州二司馬寬以濟猛嚴而不殘每行縣

錄囚徒其所平反者十八九詔徵尚書郎御史中丞蹇蹇  
諒直有王臣之節尋以公事去官復拜饒州括州越州都  
督府三州長史在會稽引陂水溉田數千頃人獲其利於  
今稱之焉遷隸曹恒常四州刺史歷政清白爲當時所重  
於是覽先賢之言知止足之分罷歸初服告老私庭乃率  
羣從子弟營別業於宜神鄉之望仙里其制宅也宗廟爲  
先廢庫爲次居室爲後喟然而言曰古人所謂歌於斯哭  
於斯聚國族於斯者吾知之矣維文明元年夏四月某日  
薨於正寢春秋八十有五嗚乎哀哉公簡貴不交流俗非



禮不動非禮不行望之儼然聽其言也屬博觀史籍不學  
書生尋章摘句而已至於臺閣舊事法令科條莫不成誦  
在心若指諸掌凡爲尚書郎二年御史中丞滿歲宰人者  
四縣上佐及專城者九州盛德形容被於謠詠門生故吏  
遍於天下永淳二年興駕幸東都召見公於金城頓訪以  
得失公採摭羣言悉心以對高宗嗟歎者良久賜几杖粟  
帛鄉里榮之一子令珍早亡朝夕溫清者四女公慨然有  
喪明之痛因不豫彌留遺命以弟之子神毅爲後越垂拱  
元年春二月某日與夫人隴西李氏合葬於某原禮也遠

近會葬千餘人操筆而爲誄者以百數嗚乎哀哉其銘曰

巖巖華山峻及於天上侵神氣下固窮泉夫惟積德生我

大賢其一滔滔河水中國之紀派別九都經營萬里夫惟積

潤生我君子其二惟忻之城惟華之亭宜陽之地益部之星

公爲其宰不殞其名其三汝陰之國薊門之北陂水朝黃燕

雲夜黑公爲其佐日宣其德其四入踐郎官含香握蘭來居

白室直繩明筆潘子一除士師三黜其五邑號鄱陽山名括

蒼東南之美吳會之鄉展其驥足實賴王祥其六四州之大

是稱都會千里之榮卽分麾蓋言旋舊國保茲耆艾其七生

爲貴臣死爲貴神陰堂是夜古木非春鄧攸無子天道何

親其  
八

杜袁州墓誌銘

公諱某字某京兆杜陵人也高辛之撫教萬方堯帝之平  
章百姓傳稱聖人之後易曰積善之家在夏爲御龍在周  
爲唐杜三王以降百代可知車服出於南陽衣冠襲於京  
兆曾祖榮業後魏秦州別駕祖良宇文朝復州長史父舉  
唐易州司兵參軍事事端履道操矢安貞厚於天爵薄於  
人位闕里之庭學夫詩禮太邱之門執其羔鴈公孝慈而

敬威莊而安狎貫義方周覽典籍服其服則文之以君子之容遂其辭則實之以君子之德起家左翊衛選授貝州司倉參軍事出自中禁在於外臺謹其蓋藏實其倉庾尋遷蓬州咸安許州長社洛州洛陽三縣令地方百里官歷三城言非法度不出於口行非公道不萌於心令不肅而威宣教不舒而德洽轉號州司馬制授朝散大夫婺州司馬又遷蘇州長史加中散大夫鸞鳳不棲於枳棘鸞雀不集於梧桐宜得其材非公莫可我大周誕受萬國寵綏四方建官惟賢垂拱而理乃命公爲朝議大夫使持節袁州

諸軍事守袁州刺史天王之使列國之君發其德音而勸  
不用賞正其顏色而禁不用刑德成而位尊名遂而身退  
乞骸告老謝病言歸以某年月日終於淮海之館春秋七  
十有七嗚乎哀哉夫人太原王氏魏驃騎大將軍新昌公  
平之曾孫唐蜀王府典軍上柱國志隆之女也纂承洪烈  
嗣續徽音中外柔嘉小大懷睦夫人之化國風美於鵲巢  
寶劔之沈夜氣衝於牛斗享年四十八嗚乎咸亨二年某  
月日終於長社之官第維天授三年春二月合祔杜陵之  
平原禮也王人弔祭儀仗官給長子某官等毀形於骨痛

貫於心父母哀哀昊天莫報佳城鬱鬱白日何年願述餘  
風式銘幽壤其銘曰

鳳凰鳴矣于彼高岡顯允君子邦家之光猗歟令德秀於  
閨房歲云暮矣池樹荒涼死則同穴如何彼蒼

欽定全唐文卷一百九十六目錄

新文藝出版社藏書

楊炯七

李懷州墓誌銘

鄴國公墓誌銘

彭城公夫人爾朱氏墓誌銘

伯母東平郡夫人李氏墓誌銘

中書令汾陰公薛振行狀

左武衛將軍成安子崔獻行狀

爲薛令祭劉少監文

同詹事府官寮祭郝少保文

爲梓州官屬祭陸鄭縣文

祭汾陰公文



欽定全唐文卷一百九十六

楊炯七

李懷州墓誌銘

公諱冲寂字廣德隴西狄道人也左衛大將軍西平王之  
孫荊州大都督漢陽王之子今上之族兄也原夫帝堯之  
緒運期授於天漢顓頊之胄大命集於皇家光耀則若木  
十枝波瀾則長河九派或中軍按部金鼓所以節其聲或  
刺史班條冕旒所以彰其德信可謂玉林多寶天族多奇  
以御家邦以藩王室者也公山河誕慶辰昴發祥金多木

少孔文舉之天骨玉潔氷清華子魚之神彩南陽季恭偉  
懸識宰臣沛國趙元儒竊知公望編漢皇之兄弟列周室  
之邢茅天下稱其八才吾家號爲千里初任尚舍直長稍  
遷城門郎仍奉敕於宏文館讀書掌舍諸宮城門列校詔  
詣東觀有黃香之博聞賜其制書有班游之廣學尋授駕  
部員外郎轉金部郎中又敕公爲戎州道支度軍糧使天  
府充初軍儲委積振南宮之紱冕譽表三臺歷西蜀之江  
山榮高駟馬遷太府鴻臚二少卿丁艱去職楊播之登太  
府初聞累遷之命鄭默之拜鴻臚遽見終喪之禮卜子夏

既祥五日彈不成聲孟獻子加人一等縣而不樂服闋歷  
青德齊徐四州刺史東臨巨海西至長原或全齊歷下之  
軍或大禹徐方之地任隆荆部陶侃八州寄重潯陽桓伊  
十部遷宣州刺史吳王舊邑楚國先封江迴鵲尾之城山  
枕梅根之冶蜀郡無此計吏則惟薦張堪潁川尤多璽書  
則但稱黃霸巡察使以尤異聞遷陝州刺史觀其井邑號  
仲上陽之故墟度其川原周公分陝之遺跡唇齒通其列  
國咽喉壯其天險善人爲政無待於百年童子行謠先符  
於兩日於斯時也天以順動帝以會昌修封禪於岱嶽作

明堂於汶上望山川而遍羣神執玉帛而朝萬國制公檢校司理常伯文昌之省遙接太階建禮之門旁連複道萬幾匡贊八座謀猷旣陪軒帝之巡乃覲漢家之事屬阿孫南走憑斗骨而爲城居衛滿東亡界朝鮮而爲役屬乘輿乃誅後至討不庭申命六事之人以問三韓之罪制曰師出遼左卿可爲北道主人檢校營州都督石門山險銅鼎河流天文則營室辨方地象則神臺鎮野供其行李鄭國有東道之名爲我主人常山當北州之寄遼東平以功遷蒲州刺史堯都蒲坂舜耕厯山昭襄王始作河橋穆天子

至於雷首汝南朕之心腹遂拜韓崇河東吾之股肱時徵  
季布遷少府監忠信爲主楊阜齊衡清白在官常林比德  
又除蒲州刺史諸童之逢迎郭伋再牧并州百姓之願得  
耿純復臨東郡孝敬皇帝國之儲嗣乾之長男四極奏於  
重光二年賓於上帝崇其諡號用黃屋於羽儀卜其園塋  
象元宮之制度山陵之建也以公檢校將作大匠游衣漢  
寢之外抱劍橋山之下百工畢力陳琳於是乎躬親諸吏  
懷恩魏霸於是乎無謫遷銀青光祿大夫行少府監若夫  
協時月乘天正秦人往事遊別館而祈年漢宮舊儀下明

庭而避暑上幸九成宮以公檢校右領軍將軍本官如故  
董司戎政以戒不虞七校陳其甲兵五營按其車服領軍  
之職用文武於紀瞻右軍之官敘勤勞於常惠尋以公事  
免左授歸州司馬楚之舊也始得子男之田夔之先也裁  
爲附庸之國人同賈傳路似長岑伯騫有聲於鄉里仲任  
見知於筆札制遷中大夫行兗州都督府長史大庭之庫  
少昊之墟上直降婁金精吐宿旁瞻日觀木德題山別乘  
初迎將宣萬邦之化佩刀終爽徒見三公之服以永淳元  
年某月日行次唐州方城縣遇疾薨朝廷聞而傷之贈懷

州刺史公嚴而有禮直而能和行孝立身移忠事主生知者上重之以八索九邱道在斯尊加之以文昭武穆故能入登常伯出踐方州爲六卿之儀表發三軍之號令列長戟於門前羅曲旃於堂下子孫朝夕玉樹相輝賓客送迎玳簪交映悲夫展禽三黜安仁再免奚辭棘署俯集桐華慘舒則不繫陰陽喜愠則不形顏色何嗟及矣竟遊東岱之山無所不知旋閉南陽之墓二年夏五月日葬於萬年縣龜川鄉之平原長子某官某次子某官某箕裘必復花萼生光隣人泣其悲慟明主憂其毀瘠觀其弔客不無雙

金史卷之二十一  
鶴之徵察其成墳自有百鳥之感森森隴樹漠漠郊烟右  
元灞而浩蕩左驪山而起伏杜陵萬家之邑非復城池滕  
公駟馬之銘不知年代其銘曰

高陽積德武昭餘慶宅鎬開基封唐啟聖協和萬國平章

百姓天敘諸侯禮樂宗正其一周之曲阜漢之平陸地則葭

莩祥惟嶽瀆鄉黨稱善閨庭雍穆始拜城門卽遊天祿其二

太微之位益部之星卿則有六四至丹青州則有九八牧

專城旣踐臺閣仍司甲兵其三倚伏無兆遭隨有運賈誼從

王桓譚佐郡自忘寵辱曾無喜愠人去何歸天高不問其四



東都門外長樂宮邊白馬旒旒青烏墓田楸梓夾路碑石  
書年百代之後南陽之阡

其五

鄴國公墓誌銘

永昌元年春二月甲申朔鄴國公薨公諱柔字懷順宏農  
人也縣犯太原王廟諱改爲仙掌焉公卽隋煬帝之元孫  
元德太子之曾孫恭帝之孫鄴國公行基之子粵若稽古  
崇德象賢統承先王修其禮物惟丞相保寧西漢惟太尉  
亮弼東朝功書王家澤流後嗣亦猶司徒之敬敷五教殷  
德日新后稷之播時百穀周有大賚隋高祖昧旦丕顯齊

聖廣淵皇天眷佑誕受顧命恭皇帝遜位明敷能讓天下  
作賓皇室與國咸休系承百代之宗國稱二王之後公山  
河積氣清白餘基孝友著於閨門信義行於邦國縱心妙  
用不出戶庭覃思典墳不窺園圃及其上公傳位命服居  
前有怵惕之心無驕矜之色漢之平帝猶敬劉歆魯之戴  
公尚聞商頌大唐貴爲辰極富有褰瀛用三王之禮以同  
天地奏八代之樂以答神祇郊上元定泰時金繩玉匣日  
觀登封左个西偏明堂布政未嘗不虞賓在列周客來庭  
禮秩尊於百寮贊拜絕於羣后猶能小心畏懼恪慎肅恭

上帝時歆下人祇協以爲藩屏以訓子孫稟命不融享年五十有五嗚乎哀哉越某月葬於某原嗣子某官生盡其孝死盡其哀學不替於爲喪禮有踰於鑽燧卜其宅兆俾無後艱述其家風謂之不朽其銘曰

有客有客乘殷之馬建於上公尹茲東夏有客有客乘殷之輅作賓王家率由典故天之蒼蒼人之云亡柏檟成行魂歸故鄉

彭城公夫人爾朱氏墓誌銘

夫人爾朱氏河南洛陽人也若夫陰山表裏衝北斗之璣

衡瀚海彌綸直西街之畢昴四時銜火燭龍開照地之光  
六月搏風大鵬運垂天之翼由是奄有京縣遂荒中土車  
書禮樂三王之損益可知將相公侯百代之山河不殞祖  
敞隋儀同三司金紫光祿大夫岐同金申信臨徐七州總  
管兵部尚書金城郡開國公天列尚書之星地標光祿之  
塞出身萬里知呂岱之元勳專命一方識劉宏之重寄父  
休最隋左千牛備身朝散大夫齊王府司馬襲封爵金城  
公大夫稱伐諸侯胙土淮仙致雨仍攀桂樹之山楚客臨  
風更入芙蓉之水夫人玉臺貞氣金河仙液蔡中郎之女

子早聽色絲謝太傅之閨門先揚麗則彭城公發源殷伯  
承家漢相山川氣候彰白虎於皋陶象緯休徵下蒼龍於  
曼倩三星照夜佇稽鳴鴈之期七日秉秋坐薦飛皇之兆  
夫人年甫十八遂歸於我巫山南眺逢暮雨於瑤姬華嶽  
西臨降明星於玉女動合詩禮言成軌則晨昏展敬事極  
於移天蘋藻挈誠義申於中饋女郎砧石響明月而思秋  
風織婦機牀聽寒蛩而催絡緯用曹大家之明訓執宋伯  
姬之貞節加以心依八覺理會三空遊智刃於檀林泛仙  
舟於法海幾神獨照默言象而無施空有兼忘束筌蹄而

不用人生天地壽非金石銀臺竊藥想奔月而何年金殿  
煎香思反魂而無日以某年月終於平原里之私第越上  
元三年十月二十日合葬於城南之畢原禮也齊侯寢側  
杜氏階前對文王之畢原用周公之合葬偃松千古長無  
寡鶴之悲文梓百尋還見雙鴛之集銘曰

合葬非古周公所存死生千載棺槨雙魂野曠風急天寒  
日昏煙霾杳嶂霧失遙村紀黃絹之碑表對青松之墓門  
伯母東平郡夫人李氏墓誌銘

夫人姓李氏隴西狄道人也自涼武昭王以後一門三公

爲四海著族國史家牒詳之矣祖充穎後周大將軍滑州  
刺史流江郡公考元明皇朝上儀同闕濟三州刺史成紀  
縣男出入三朝剖符分竹秦隴河濟之地人到於今稱之  
天下士大夫知與不知莫不想望其風采夫人生而純深  
幼而恭敬長而敦睦成而和惠年初及笄甫歸於我執箕  
帚奉舅姑人不間於其娣姒妾媵之言閨門之內穆如也  
故宗黨推其令問鄉閭以爲美談東平公守清白之基逢  
太平之日辟命交至聲聞於天詔徵尚書郎遷御史中丞  
出爲棣曹恒常四州刺史夫人輔佐君子聿修內政平旦

纚笄則有君臣之嚴沃盥饋食則有父子之敬報反而行  
則有兄弟之道受期必誠則有朋友之信其婦德也如此  
厯職中外聲名藉甚和其琴瑟正其邦家者夫人與有力  
焉蓋常喟然而言曰古者卿之內子爲大帶命婦成祭服  
社而獻功可不勛哉可不勛哉由是服澣濯之衣躬紡織  
之事筐筥錡釜之器所以執其勞蘋蘩蕝藻之菜所以明  
其德非夫博文達禮貞婉聽從者孰能與於此乎及公乞  
骸告老退歸初服夫人年踰耳順視聽不衰每獻歲發春  
日南長至羣從子弟稱觴上壽者動至數十百未嘗不歡



言善誘借以溫顏侃侃焉閭閻焉有孟母之風焉有敬姜  
之誨焉維永淳元年秋八月旁死魄寢疾彌留終於華陰  
之望仙里享年八十有一冬十一月一日丙辰遷窆於永  
豐鄉之平原從先兆也東平公撫存懷舊用痛悼於厥心  
遠近咸集宗親畢會生榮死哀其此之謂矣是日也皇太  
子監守長安炯忝爲詹事司直不獲展哀喪次陪奉靈輶  
敢薦李禹之文庶同潘岳之誄嗚乎哀哉銘曰

高岳之上浮雲翔兮函谷之外真氣揚兮建功北狄討西  
羌兮受封南鄭家素昌兮於赫祖考爲龍光兮牧州典郡

佩銀璜兮降生淑質秉禎祥兮茗華菊茂蘭若芳兮我有  
懿德如珪璋兮求之卜筮鳴鳳凰兮君子至止玉環鏘兮  
室家好合琴瑟張兮執其麻枲供衣裳兮羞其饋食澄酒  
漿兮諸姑伯姊穆溫良兮姨姒叔妹歡未央兮公之出牧  
守四方兮夫人之化德洋洋兮公之告老返維桑兮閨門  
之內道彌彰兮正月上日南至長兮子孫歡慶各稱觴兮  
宋云孟母魯季姜兮匪怒伊教由舊章兮方期高舉登紫  
房兮誰謂冥默掩元堂兮肅肅松檟鬱成行兮沈沈厚窆  
終不暘兮

中書令汾陰公薛振行狀

高祖德魏給事中黃門侍郎御史中尉散騎常侍直閤輔  
國二將軍齊州刺史贈車騎將軍儀同三司華州刺史諡  
曰簡懿曾祖孝通魏中書黃門二侍郎銀青光祿大夫散  
騎常侍關西道大行臺右丞常山太守汾陰侯贈車騎將  
軍儀同三司齊鄭二州刺史祖道衡齊中書黃門二侍郎  
隋吏部內史二侍郎上開府儀同三司陵卽潘襄四州刺  
史襄州總管司隸大夫皇朝贈上開府臨河縣開國公父  
收皇朝上開府兼陝東道大行臺金部郎中天策上將軍

府記室參軍文學館學士上柱國汾陰縣開國男贈定州  
刺史太常寺卿諡曰獻河東郡汾陰縣薛振年六十二字  
元超狀昔者唐堯之協和萬邦也有若四岳之敬順昊天  
歷象日月虞舜之慎徽五典也有若八元之忠肅恭懿宣  
慈惠和夏禹之分別九州也有若咎繇之謨明弼諧允迪  
厥德殷湯之南征北怨也有若伊尹之格於皇天姬文之  
受命作周也有若虢叔之聞於上帝自唐虞而列考及秦  
漢而無譏元首必藉於股肱方隆太平之化賢者必待於  
明主克致崇高之業若夫驂駕六龍驅馳七聖斟酌元氣

財成天道者其惟聖人乎宏闡大猷發揮神化匡正八極  
阜成兆人其惟良宰乎我大唐之建國也粵若神堯明揚  
側陋文王叶於朕卜迎太公於渭水高宗求於朕夢得良  
弼於傅巖若歲大旱以爲霖雨若濟巨川以爲舟楫者也  
公含天地之間氣依日月之末光能備九德兼資百行探  
蹟索隱極深研幾齟齬之際羞言霸道詞賦之間已成王  
佐年六歲襲爵汾陰男十一太宗召見敕宏文館讀書十  
六爲神堯皇帝挽郎十九尚和靜縣主高宗升儲之日也  
勅公爲太子通事舍人二十二除太子舍人高宗踐位詔

遷朝散大夫守給事中年二十六尋拜中書舍人宏文館  
學士三十二丁太夫人憂去職起爲黃門侍郎固辭不許  
修東殿新書畢進爵爲侯公毀瘠過禮多不視事出爲饒  
州刺史上夢公徵爲右成務四十復爲東臺侍郎是歲也  
放李義府於邛笮舊制流人禁乘馬公爲之言左遷簡州  
刺史歲餘上官儀伏誅坐詞翰往來徙居越舊五十三赦  
還拜正諫大夫五十四遷中書侍郎尋同中書門下三品  
兼檢校太子左庶子五十九遷中書令車駕幸洛陽詔公  
兼戶部尚書與皇太子居守俄以風疾不視事高宗崩興

疾往成都抗表辭位至於再至於三詔加金紫光祿大夫  
仍聽致仕以光宅元年季冬旁死魄薨於洛陽豐財里之  
私第嗚乎哀哉公地藉膏腴姻連戚里鼎湖長往拜卿子  
而爲郎金榜洞開徵列侯而尚主遂乃彈冠筮仕策名委  
質叩天門於畫闕攀鳳翼於紫宸凡升右轄者一年居外  
臺者兩郡四遷門下二入中書用能燮理我陰陽經緯我  
天地鹽梅我寶鼎梁棟我宸極理百官而察萬人平邦國  
而和上下借如風后天老左右軒皇蕭何曹參謀猷漢室  
未有一心事主四十餘年參兩宮而出入厯三臺而陟降

合其道也大壑縱其鯤鵬遇其時也名山出其雲雨功成  
輔弼德邁幾深星象不憊方踐中台之位山川並走竟遊  
東岱之魂天不憊遺民將安仰越翼日詔贈光祿大夫使  
持節都督秦成武渭四州諸軍事秦州刺史餘如故賜物  
四百段米粟四百石東園祕器凶事給儀仗至墓所往還  
司賓卿監護璽書弔祭別降中使賜斂衣一襲雜物百段  
又詔陪葬乾陵依故事也公襲封之年也受左傳於同郡  
韓文汪至天王狩河陽乃廢書而歎曰周朝豈無良相何  
得以臣召君文汪異焉神堯皇帝婕妤河東郡夫人公之



姑也每侍高祖詞翰高祖嘗顧曰不見婕妤姪數日便謂社稷不安其見重如此上幸溫泉射猛獸公奏疏極諫上深納焉後因閑居謂公曰我昔在春宮與卿俱少壯光陰倏忽已三十年往日賢臣良將索然俱盡我與卿白首相見卿歷觀書傳君臣共終白首者幾人我觀卿大憐我我亦記卿深公嗚咽稽首謝曰先臣早參麾蓋文皇委之以心膂臣又多幸天皇任之以股肱誓期殺身報國致一人於堯舜伏願天皇遵黃老之術養生衛壽則天下幸甚賜金二百鎰公有事君之節也不亦忠乎每讀孝子忠臣傳

未嘗不慷慨流涕以爲帝舜非孝子朱雲非忠臣客有譏之者公曰寧有揚君父之過而稱忠孝哉太夫人薨公每哭嘔血杖而後起上見公柴毀泣曰朕遂不識卿卿事朕君父一致遂至於滅性可謂孝乎中書省有一磐石隋內史府君常踞而草詔及公揮翰躍鱗每見此石未嘗不泣然流涕公有至性之道也不亦孝乎其年修晉史筆削之美爲當時最孝敬崩詔公爲哀冊上幸九成宮敕皇太子赴行在所置酒別殿享王公以下時太子英王侍皇帝酒酒酣公獻壽曰天皇合易象乾將三男震坎艮今日是也

上大悅百官舞蹈稱萬歲賜雜物百段銀鏤鍾一枚吐蕃  
不庭詔英王爲元帥摠戎西討公賦西征詩一首上稱善  
嗟歎者久之因代英王屬和御筆繕寫朝以爲榮公有屬  
詞之美也不亦文乎黃門侍郎上疏薦高智周任希古郭  
正一王義方顧徹孟利貞等後皆有重名厯登清貫及兼  
左庶子又表鄭祖元沈伯儀賀覲鄧元捷顏強學崔融等  
十人爲學士天下服其知人公爲右成務獻封禪書及平  
夷策上深納焉或有抵罪者同類數百經赦令獄官評經  
年不決竟以死論公上疏陳其濫詔百寮廷議獄官及諸

宰臣未有所決公酬對如響衆咸服焉上歎息曰幾令我  
殺無辜之人百寮莫不震懼又上疏陳請備塞垣未幾而  
匈奴背誕公有神通之鑒也不亦明乎儀表魁傑鬚眉若  
畫身長七尺四寸望之儼然喜愠不形於色雖至於近習  
左右胥徒僕妾莫不待之以禮公有行己之方也不亦恭  
乎在饒州六年以仁明馭下鄱陽北岡上忽生芝草一株  
郡人以爲善政所感共起一舍號曰芝亭因立碑頌德公  
有馭人之術也不亦惠乎在邛都十餘載沈研易象韋編  
三絕賦詩縱酒以樂當年有醉後集三卷行於世公有安

和之德也不亦康乎上初覽萬幾公上疏論社稷安危君臣得失上大驚卽日召見不覺膝之前席歎曰覽卿疏若暗室而照天光臨明鏡而覩萬象此後寵過日隆每軍國大事必參謀帷幄在中書獨掌機務者五年出納帝命口占數百上曰使卿長在中書一夔足矣大駕東巡詔公驂乘上曰朕之留卿若去一目若斷一臂關西事重一以委卿因賜物百段公有社稷之勳也不亦重乎若夫有官功者賜其官族有大行者受其大名公叔列國之陪臣猶安社稷黔婁匹夫之介節不忘仁義古今以爲通訓書籍以

爲美談況乎輔佐明主寧濟天下生死無二始終若一業  
高於六相道貫於五臣其生也榮同心比於周召其死也  
哀陪葬均於衛霍豈使易名之典不及於會同賜諡之文  
不傳於終古門生故吏願述德音博士禮官佇聞清議是  
則鍾繇之策降於皇魏之年王導之疏寢於中興之日謹  
狀垂拱元年四月四日故中書令汾陽公府功曹姓名謹  
狀文昌臺考功竊聞生爲貴臣車服昭其令德死而不朽  
諡號光其大名今謹按故府主中書令汾陰公贈秦州都  
督薛元超以王佐之才逢太平之會撫綏萬國康濟兆人

力牧輔軒皇未爲盡善皋陶佐大禹猶有慚德名遂身退  
生榮死哀羽父之請魯君抑惟舊典衛侯之謚文子庶幾  
前列謹上

左武衛將軍成安子崔獻行狀

祖宏壽隋獲嘉縣開國侯父萬善皇朝左監門將軍持節  
隆州諸軍事守隆州刺史上護軍成安縣開國男謚曰信  
某郡某縣崔獻年六十七夫推其天命南端上將之文考  
其地靈北極崆峒之武厭次有東方曼倩卓達於孫吳瑯  
琊有諸葛孔明深期於管樂貞觀九年起家太穆皇后挽

郎十六年授營州都督府參軍事燕齊遼遠所以分置營  
州天子命我以參卿軍事太宗文武聖皇帝把斧鉞動璇  
璣發西土之人爰整其旅問東夷之罪恭行天罰公自家  
刑國資父事君樂王粲之神武棄班超之筆硯一鼓作氣  
方輕肉食之謀七旬舞干始受昌言之拜二十三年遷除  
王府西閭祭酒梁孝王武者漢皇之少子廣東苑屬平臺  
則司馬相如所以騁其詞賦陳思王植者魏國之天人遊  
西園擁飛蓋則邯鄲子淑所以爲其賓友永徽六年授晉  
州司士龍朔三年遷岐州司戶翦桐垂棘珪璧相輝紫鳳



寶雞休祥狎至從乾值巽之風土被山帶河之國邑邦君  
坐嘯方推太守之名鄰國從遊始屈陪臣之禮尋丁外憂  
三年泣血一慟能使禽獸莫觸其松柏神仙每留其玉石  
春秋忽變有君子之終身金革不辭達賢人之俯就麟德  
元年有詔起公爲左威衛修仁府左果毅都尉仍命羽林  
軍長上乘輿歷日月步山川詳益地之圖書聽干雲之律  
呂長城十角盡入提封高闕三襲並爲州縣於是九姓抗  
表請築安北府城詔公馳驛許以便宜從事則榮奉中旨  
計日期還親降鑾輿待於故都樓上雖復東西萬里張博

望之尋河裝橐千金陸大夫之使越猶未聞降星蹕迴帝  
車擬於陶侃扣天門之八襲方於魯陽留白日於三舍若  
夫類上帝徧羣神則孔宣父之所刊者五年一狩登泰山  
禪梁甫則管夷吾之所識者十有二君秦皇致風雨之迷  
魏后積貂羊之恥夫名山之所望非我后而誰哉是以馭  
蒼龍控玉鳳陰陽不測發揮於作樂之文天地無私揖讓  
於升中之禮公受命陪祠汶上扈蹕梁陰列藩衛於環星  
受嘉名於捧日與夫茂陵之下獨留符命之書河洛之間  
不覩漢家之事豈同年而語也朝鮮舊壤歌箕子之風謠

斗骨危城屬烏孫之背誕地惟孤竹不聞謙讓之名親則  
同株曾無急難之意特進泉男生以蕭牆構孽蔓草方滋  
欲去危而就安思轉禍而爲福請歸有道使者相望天皇  
慙一物之推溝詔公於國城內迎接先之以造化之大示  
之以雷霆之威受其壁焚其櫬更徵侍子來朝京闕亦猶  
酈生憑軾入齊國而下其城賈誼上書伏匈奴而答其背  
乾封元年詔遷遊騎將軍左威衛義陽府折衝都尉仍加  
上柱國右羽林軍長上如故是歲也太子太師英國公登  
壇而拜鑿門而出紫泥明詔不入於三軍之中黃石奇兵

自行於九天之外山林爲室不能有藩籬之險魚鼈成橋  
不能有逃亡之路詔公出使預參帷幄進奇策納嘉謀攘  
無臂而執無兵戰必勝而攻必取斬大風之翼霧卷青邱  
卧長鯨之鱗煙銷碧海二年以平夷功詔除定遠將軍右  
武衛中郎將檢校左羽林軍總章二年詔遷宣威將軍守  
左武衛將軍檢校右羽林軍襲封成安男咸亨二年進爵爲  
子尋奉別敕檢校右羽林軍餘如故太夫人以桑榆晚節  
霧露沈疴感年歲之扶危受皇天之賜藥屢陳表疏方請  
告歸頻降絲綸未蒙優許則知忠臣奉上多從孝子之門

受命臨戎始見忘家之事潘安仁之豈弟始奉輕軒張景  
允之純深終悲畫扇儀鳳三年以內憂解職尋降詔起復  
本官四年加雲麾將軍正除左武衛將軍檢校右羽林軍  
如故王人奪服纔聞趙熹之喪明主相憂獨訝何曾之毀  
且割哀而從禮將以義而斷恩受軍麾命服之數掌期門  
飲飛之職以漢宮清署忽照邊烽秦塞長城遂聞胡馬匈  
奴未滅霍去病所以辭家天子動容周亞夫於馬不拜調  
露元年詔公龍門鎮守兼於夏州防捍飲冰受命倍道兼  
行鞍甲成勞晦明爲疾璽書降問卽日追還中使接跡於

家庭尚藥綢繆於錫賚人生詎幾神道何知仰觀於天值  
三軍之星落俯察於地逢五將之山崩詔書來北斗之門  
圖像在南宮之壁以三年秋七月薨於紫桂宮右羽林軍  
之官第詔賜御食并錦被一張常服一襲雜采百五十段  
賜物一百段粟一百石敕書弔贈禮越常班喪葬所資數  
優恒典琳琅觸目日月在懷陶謙則戲引幡旗賈逵則常  
陳部伍閨門有德歡若友朋事君無隱心如鐵石至如出  
車授鉞東征西討孤虛向背則雖女子之眾可以當於丈  
夫前後折旋則雖婦人之兵可以蹈於湯火兔起而鳬舉

龍騰而鳳飛無戰不平無城不剋有如馮異羞言大樹之  
功宛似魯連不受黃金之賞太平之事業行矣人主之恩  
榮備矣山河之寵久預同盟社稷之臣俄悲輟祭聖君興  
悼列辟相趨覩高屋而歎良弓聞鼓輦而思將帥宏圖祕  
略實無得而稱焉追遠飾終請有易其名者謹狀永隆二  
年正月十一日故左武衛將軍成安子府功曹某上尚書  
省考功名也者功之表也諡也者行之跡也公叔文子曾  
辱四鄰之交黔婁先生有餘天下之貴謹按故府主左武  
衛將軍上柱國成安子崔獻誕靈辰昴降德山河漢陽閭

忠許有良平之策潁川徐庶知其管樂之才生覩太平仕  
逢明主秋風金鼓有司馬之論兵吉日壇場有將軍之拜  
職任重而道遠功成而身退奄息百夫之特彼蒼者天相  
如千載之人猶有生氣珠襦玉匣禮備於喪終筮短龜長  
事從於先見易名之道蓋取之於舊儀累德之文敢希之  
於執事謹狀

爲薛令祭劉少監文

中書令河東薛某謹以清酌中牢之奠謹祭故少監劉公  
之靈惟彼陶唐有此冀方上天祚漢人神攸贊開國承家



枝分葉散三貂赫赫於臺省駟馬謖謖於里閭德之有隣  
吐符兮降神家之積慶受祿兮宜君星躔可以衡南越都  
邑可以質西秦言鄭公之不死謂張衡之後身雍州爲積  
高之地初登吏部尚書卽喉舌之端始拜郎官見天子而  
題柱侍明光而握蘭入麒麟之閣圖書掌於河洛測璇玉  
之機造化窮於制作大風積也方絕於雲天有力負之生  
悲於溝壑嗚乎哀哉言念平生求其友聲適我願兮共得  
朋從之道又吾姨也俱承下嫁之榮良辰美景必躬於樂  
事茂林修竹每叶於高情援蒹蘭而無愧指金石以當行

誰言倏忽遽隔幽明人非兮地是心折兮骨驚卜日兮先  
遠陰雲凝兮歲將晚臨平原兮望行幃君一去兮何時返  
石室兮沈沈蓬萊山兮寂又陰蒼煙漫兮紫苔深陳絮酒  
兮涕沾襟嗚乎哀哉

同詹事府官寮祭郝少保文

少詹事鄧元機永昌令令狐恩府司直王思善楊炯主簿  
鄭行該等謹以清酌庶羞之奠敬祭太子少保郝公之靈  
若夫星象降質山川受氣以道爲尊以和爲貴軒后夢之  
於大澤文王卜之於清渭實憑舟楫之功必藉鹽梅之味

昭昭北斗宮號文昌隱隱西掖池名鳳凰增萬機而參政  
本定五字而對休光珥豐貂之奕奕識遺佩之鏘鏘懸車  
之歲方稱國老步輦之榮遂居師保劉蕃以光祿緝熙和  
嶠以尚書贊道百年方享於期頤五福冀徵於壽考西山  
訪藥北壁尋經金丹不化玉藥何成梁木斯壞曲池坐平  
府庭颯而色變窳窳慘而相驚嗚乎哀哉元機等親聞教  
義夙承提獎懷德音之不忘痛丹壑之長往門館聞寂簾  
帷仿像冀行潦之蘋蘩庶明靈之降饗嗚乎哀哉

爲梓州官屬祭陸鄭縣文

維垂拱二年太歲丙戌正月壬寅朔二十二日癸亥長史  
劉某謹以清酌庶羞之奠敬祭陸明府之靈夫萬里之別  
猶使飲淚成血思德音之斷絕况百年之分能不憂心如  
薰想公子兮氛氲惟彼積德挺生夫君天垂白氣地發黃  
雲江則有汜爲國之紀君傳其政愛人如子山則有梁鎮  
茲一方君宏其道視人如傷久勞於外路阻且長曾未朞  
月人之云亡嗚乎哀哉哀哀弱嗣朝暮一溢皎皎孀妻顏  
乎下室蜀門如劍長安如日歸路何從我心如疾嗚乎哀  
哉凡我在位羈官邊城共戮力兮誰言死生思其人兮造

其戶庭恍無見兮寂無聲稱觴兮酌酒心折兮骨驚嗚乎  
哀哉

祭汾陰公文

維大唐光宅之元祀太歲甲申冬十有二月戊寅朔丁亥  
御辰楊炯以柔毛清酒之奠敢昭告於故中書令汾陰公  
之貴神惟公含純德而載誕今稟元精而秀出備百行而  
立身兮半千年而委質屬天地之貞觀兮逢聖人之得一  
若夔龍稷禹之寅亮舜朝兮若蕭曹魏邴之謀猷漢室懸  
大名於宇宙兮立大勳於輔弼如何斯人而有斯疾曾未

遐壽中年殞卒嗚乎哀哉若夫家傳寶鼎地闢金溝文則  
屬詞而比事兮學則八索而九邱入則東藩之上相兮出  
則南面之諸侯唯盡善兮未善固雖休而勿休既知退而  
知進兮亦能剛而能柔大才則九功惟敘兮大知則萬物  
潛周崇德廣業兮樂天知命而不憂嗚乎哀哉門館虛兮  
寂寞歲窮陰兮搖落備物儼兮如存光靈眇兮焉託垂纒  
帷與祖帳兮罷歌臺與舞閣天子惜其毗余兮羣臣思其  
可作嗚乎哀哉拊循兮弱齡叨襲兮簪纓公夕拜之時也  
既齒跡於渠閣公春華之日也又陪遊於層城參兩宮而

承顧盼兮歷二紀而治恩榮郭有道之青目兮蔡中郎之下迎候焉今古非復平生無德不報兮願摩頂而至足有生必死兮空歛恨而吞聲天慘慘兮氣冥冥月窮紀兮日上丁藉白茅兮無咎和黍稷兮非馨嗚乎哀哉